

FESTA MANNA IN TRATALIAS

SU PELLEGRINÀGIU DE SA REINA DE SU SULCIS

P

Pretzisa, sa giòbia in antis de s'Ascensioni - a comentu acuntessit

de ormai cinqu sèculus - **Maria Munserrada** est torrada a domu sua in sa crèsia de Tratalias Bècia, e duncas ant fatu sa Festa Manna, connota e famada in totu su logu.

At partecipau genti meda a totus is funtzionis religiosas, e longa meda fiat sa prucedioni de su lunis (su 2 de làmpadas) chi at mòviu de sa crèsia romànica e at acumpangiau sa Santa a sa bidda noa. Sa presèntzia manna de fidelis testimòngiat sa devotzioni sintzilla de is sulcitanus po sa Reina de su Sulcis.

Est andada beni meda fintzas sa festa civili: ant bèndiu totus is billetus de sa loteria: su guadàngiu at a serbiri po pagai sa festa e a sustenni sa comunidadi parrochiali trataliesa. Is ispetàculus organizaus ant fatu a manera chi is arrugas e is pratzas de sa bidda bècia si prenessint de genti chi est arribada de totu su Sulcis.



TEULADA

FUEDDANT IS ARRUGAS E IS PRATZAS DE SU CENTRU STÒRICU

Su 24 de maju passau in sa Sala Spiga prena a intipu ant presentau "**Le strade parlanti**", s'urtimu traballu de su stòricu locali Salvatore Loi. A Pustis de is saludas de su sindigu **Angelo Milia** chi at arregordau sa gènesi de su progetu, est intervènnia **G. Martini** chi at presentau tres scenas recitadas e bogadas de su libru etotu cun s'agiudu de sa scenògrafa **Anna Pina Buttiglieri**. Avatu s'autori, chi fiat emozionau meda, at arrexonau de su traballu suu impari a **Caludia Cocco**, spieghendi cantu siat de importu a firmari is

contus chi formant sa memòria colletiva de sa comunidadi teuladesa, chi in is sèculus est arrinnèscia a formai personàgius chi ant tentu unu ruolu fintzas in is dinàmicas regionalis e natzionalis. S'òpera, letura cuntzillada a totus is amantiosus de sa stòria locali, est praxibili meda poita ca ndi bessint a pillu totus cussas fortzas, a bortas misteriosas, chi de sèmpiri movint is singulus a intrus de is grupus: sa ganas de podèriu e sa de arriscatu, sa malasorti e s'ingènniu, su bonu e su malu... E podit essi chi custos contus torrunt a sa lingua mama insoru: su sardu.

SANTADI

Su 16 de maju in sa biblioteca comunali **Simonetta Ucheddu** at presentau "*Io, la bottiglia, la vita*". Pustis de is saludas de s'Assessora a sa cultura de Santadi **Veronica Impera**, **Simonetta** impari a s'editori **Claudio Moica** at contau chena de nisciunu filtru, s'esperienza dolorosa, longa e drammatica de s'alcolismu.


Simonetta at incumentzau a bufai a piciochedda pitica e at sighiu fintzas a chi fiat mamma de duas pipias. A unu certu puntu, cun s'agiudu de su maridu e de su dotori G. Madeddu, est arrinnèscia a binci sa dipendèntzia de sa butillia. Oi est a disponimentu de totus is chi funt in difficultadi cun s'assòtziu "**Amici della Vita**", chi est annus meda traballendi in su Sulcis, sèmpiri a sa muda, donendi una manu de agiudu a totus is chi tenint abisòngiu. Custu liburu, chi est letura cuntzillada, siguramenti donat spera fintzas a is chi creint de essi ormai pèrdius.



Sa Sala Spiga prena a intipu po sa presentada de "*Le Strade Parlanti*"



S'autora de su libru, **Simonetta Ucheddu**



SU GAZETINU SULCITANU



PROGETU SIGHENDI A ATOBIAI E A CONTAI SU SULCIS (L. 482/99 L.R. 22/18) • LÀMPADAS 2025

SPORT: IS ISCUADRAS SULCITANAS ANT ACABAU IS CAMPIONAUS INSORU.

Est andada in archìviu s'istasoni sportiva 2024-2025. No est andada beni a s'**Atletico Masainas** impegnau in su campionau de Promotzioni: at fatu sceti 28 puntus e calat in Prima Categoria. Duncas s'annu chi benit est torra derby in prima cun su **Santadi Calcio** chi est arrinnèsciu a si sarvai bincendi partidas medas in su gironi de torrada. In Segunda Categoria sa **Pol. Sant'Anna Arresi** s'est sarvada cun trancuillidadi e est abetenti su **Villaperuccio 2024** chi at bintu su campionau de Tertzza. Is baroniesus, innantis de fai festa manna si dd'ant gherreda fintzas a s'ùrtima partida cun su **Teulada Calcio** chi s'annu chi benit sighit a fai derby cun is bixinus de s'**Arresina**.

Grandu resurtau at fatu su **Malasainas Calcio a 5**: s'est guadangiau sa promotzioni in C2 bincendi su girone B de sa sèrie D e pustis at bintu sa Coppa Italia regionale in Carbònia. Est pretzisu a sinnialai ca is picioas de sa **Pallavolo Giba** ant fatu bonu campionau in sèrie D de volley acabbendi a su de 5 postus e ca est acanta de incumentzai s'aventura de su **Sulcis Futsal**, una squadra, fundada ocannu, de fuba a 5 sceti de fèmminas chi tenit bidei de partecipai a unus cantu torneus de zona.



In artu su Villaperuccio 2024 (foto de Dario Frau); in bàsciu su Sulcis Futsal (foto de Facebook)



GIBA

Domigu 25 de maju ant fatu sa de tres editzions de **Giba di corsa**. Amantiosus de s'atividadi fisica si funt atobiaus a mengianu prontus po fai una bella cursa de 10 km o, po chini non ddi praxiat a curri, una passillada de 5 km. De chi totu est acabau ant cuncordau unu pràngiu a su parcu de Is Muras. Grandu prexu e partecipazioni de sa populazioni a custu bellu event.



Is sportivus prontus a curri (foto de A.Cocco)



NUXIS

SA PRATZA ARRÙBIA DEDICADA A FRANCESCO MURRU

In Nuxis, su 6 de làmpadas ant intitulau sa **Pratza Arrùbia** a **Francesco Murru** chi, candu si nd'est distacau de Santadi est stètiu su primu sindigu (1958-1966). Duncas de chi ant ant arregordau a sa figura de Murru, connotu po essi òmini de "unu fueddu sceti", su predi at benedixiu sa targa e sa pratza e in s'ocasioni ant

incingiau su murale chi si narat "**Sindigu a cuaddu**", ùrtima faina de s'artista locali **Sofia Trogu** chi dd'at pintau a un'oru de sa pratza etotu. At figurau a Murru andedi a cuaddu in su sartu de Nuxis, cun is tonalidadi de is coloris originalis de sa pratza (arrùbiu) chi in s'arti est simbolu de vida e de movimentu.

ARRESI

Funt acabendi is is traballus chi s' Amministratzioni Comunali at bòfiu fai po aderetzai is parchègius e po melliorai sa viabilidadi in **Porto Pino** e in **Portu Pineddu**. In custa manera si podit donai unu servitziu prus bonu non sceti a is turistas ma a totud is sardus chi dònna istadi lompint a tropas po si gosai sa bellesa de sa prenda sulcitana.



REGIONE AUTÒNOMA DE SARDIGNA
REGIONE AUTONOMA DELLA SARDEGNA



Sa Bertula Antiga

